

Pachi Place

Tòg maldat a gana! Despues di tantu aña di lucha, nos isla tin su mes “Kampo Alegre”. I awor, sin ningun protesta, asta tin un bòrchi poné na grandi ku e palabranan *Pachi Place* pa laga tur hende sa ku bisio a triunfá riba birtut.

Nan a argumentá ku mester traha un sentro di prostitushon **pa e pobersito kabayeronan stranhero** na nos isla. Echu ta ku **mayoria** “kliente” di e prostitutanen **NO** ta stranhero. **Mayoria ta nos mes hendenan...** ta BO tata, BO esposo, BO “hòmber”, BO suegro, BO sua, BO ruman hòmber, BO tio, BO primo. E supuesto kompashon pa e “pobersito kabayeronan stranhero” tabata solamente un kapa pa hende lokal haña nan gana.

Nan a argumentá ku un sentro di prostitushon lo prevení hòmbenan stranhero di dañá bida di nos yunan muhé. Pues, protehá nos yunan muhé dor di ofresé otro muhé. Segun e rasonamentu ei, relashon seksual ku un mucha muhé di nos isla ta algu mucho mas malu ku sèks ku un prostituta. Sinembargu e argumento ei ta **purba evitá e konsekuensianan di piká so, no e piká mes**. Ma Dios ta bisa “*Apstené boso di inmoralidat eksual*” (1 Tesalonisensenan 4:3). Dios ta kondená TUR relashon seksual fuera di matrimonio, sea ta ku prostituta òf señorita. Ta bèrdat ku e konsekuensianan pa e yùfrou por ta mas serio. Ma esei no ta hustifiká nos aprobashon di algu ku Dios ta kondená. I no lubidá ku tin konsekuensia serio pa esun ku ta mete ku prostituta. Entre otro Beibel ta deklará, “...*esun ku hasi esaki ta kaba ku su mes. Herida i desonor lo e haña, i su reproche lo no wòrdu kitá nunca*” (Provèrbionan 6:32-33).

Nan a argumentá ku pèrmitiendo un sentro di prostitushon lo evitá otro akto immoral. I hopi hende siegamente a aseptá nan rasonamentu ridíkulo ku mester pèrmití piká pa prevení piká. Esei ta puru lokura. **Pèrmitiendo piká ta hasi piká rende, no mengua!** Pakiko nos no ta sigui e mésun lógika den otro área? Pakiko nos no ta legalisá hòrtamentu na 1 hotèl so pa nos por protehá otro hotèlnan i e restu di nos isla kontra ladronisia? Esei lo ta un protekshon efektivu? Of pakiko no pèrmití matamentu den un bario so pa prevení matamentu den tur otro bario? Rasonamentu estúpido! Pakiko anto nos ta aseptá e mésun rasonamentu estúpido ora ta trata di prostitushon? Kombatiendo piká ku piká nunca ta deshasí di piká!

Nan a argumentá ku hende hòmber **no por** ehersé dominio propio seksual. Esei tambe ta puru mentira! **Echu ta ku hopi hende hòmber NO KE ehersé disiplina moral**. Nan ta papia immoral, yena nan mente ku pensamentu immoral, wak pelikula i plachi immoral deseñá pa stimulá deseonan sensual, anto ta pretendé ku nan no por yuda ku nan ta kometé aktonan immoral.

Ma nan por yuda ku nan a hasi nan mente un kashi di piká. Hesus a bisa ku echunan ta resultado di pensamentu. “*Pasobra for di kurason ta sali...adulterio, fornikashon...*” (Mateo 15:19). Hende hòmber **por** ehersé dominio propio, ma mester kuminsá dor di kontrolá nan pensamentu.

Nan a argumentá ku tur prostituta lo ta lokalísá na un solo sitio. Kisas esei ta bèrdat pa ku prostitutanen stranhero ku ta haña pèrmit oficial. Ma no ta asina naif pa kere ku Pachi Place a deshasí di tur otro prostitushon? E “ofishi” baho aki ta tuma lugá ketu bai den otro bario, sea ta muhé stranhero òf yu di tera (por ehèmpel un drogadikto femenino).

Wèl, nan a haña nan gana. Nan argumentonan a parse bunita, rasonabel i asta a aparentá di gotia di kompashon, i lo a konvensé. Ma Dios Su kontesta ta un “NO!” enfátiko i nos tambe mester para riba ku “NO!”

Kòrda, tin un bewaker na porta di Pachi Place ku bo no ta mira...Dios. I un dia bo mester duna kuenta n'E.